

Слава Святей, и Единосущной, и Животворящей, и Нераздельней Троице всегда, ныне и присно и во веки веков. Аминь.

Приидите, поклонимся Цареве нашему Богу.

Приидите, поклонимся и припадем Христу, Цареве нашему Богу.

Приидите, поклонимся и припадем Самому Христу, Цареве и Богу нашему.

Приидите, поклонимся и припадем Ему.

Предначинательный псалом (103-й) (избранные стихи).

Благослови, душе моя, Господа! Благословен еси Господи!

Господи Боже мой, возвеличился еси зело. Благословен еси Господи!

Во исповедание и в велелепоту облеклся еси. Благословен еси Господи!

Творяй ангелы Своя духи и слуги Своя пламень огненный. Дивна дела Твоя, Господи!

На горах станут воды. Посреде гор пройдут воды. Дивна дела Твоя, Господи.

Вся премудростию сотворил еси. Слава Ти, Господи, сотворившему вся.

Слава Отцу, и Сыну, и Святому Духу, и ныне и присно и во веки веков. Аминь.

Аллилуиа, Аллилуиа, Аллилуиа, слава Тебе, Боже (трижды).

Великая ектения.

Миром Господу помолимся...

Стихословие кафизмы

Блажен муж, иже не иде на совет нечестивых.

Аллилуиа (трижды после каждого стиха).

Яко весть Господь путь праведных, и путь нечестивых погибнет.

Работайте Господеви со страхом, и радуйтесь Ему с трепетом.

Блажени вси надеющийся Нань.

Воскресни Господи, спаси мя, Боже мой.

Господне есть спасение, и на людех Твоих благословение Твое.

Слава, и ныне. Аллилуиа, Аллилуиа, Аллилуиа. Слава Тебе, Боже (трижды).

Малая ектения

Паки и паки миром Господу помолимся...

Стихиры на Господи воззвах

Глас 5. *Господи, воззвах к Тебе, услыши мя.*

Господи, воззвах к Тебе, услыши мя. Услыши мя Господи. Господи, воззвах к Тебе, услыши мя: вонми гласу моления моего, вегда воззвати ми к Тебе. Услыши мя Господи.

Да исправится молитва моя, яко кадило пред Тобою, воздеяние руку моею, жертва вечерняя. Услыши мя Господи.

Воскресны стихиры глас 5

Стих: Изведи из темницы душу мою, исповедатися имени Твоему.

Честным Твоим Крестом, Христе, диавола посрамил еси, и Воскресением Твоим жало греховное притупил еси, и спасл еси ны от врат смертных: славим Тя, Единородне.

Стих: Мене ждут праведницы, дондеже воздаси мне.

Воскресение даяй роду человеческому, яко овча на заколение ведеса, устрашишася сего князи адстии, и взяшася врата плачевная. Вниде бо Царь славы Христос, глаголя сущим во узах, изыдите: и сущим во тьме, открыйтеся.

Стих: Из глубины воззвах к Тебе Господи, Господи, услыши глас мой.

Велие чудо, невидимых Содетель, за человеколюбие плотию пострадав, воскресе Безсмертный. Приидите отечествия язык, Тому поклонимся: благоутробием бо Его от прелести избавльшеся, в Трех Ипостасех Единого Бога пети навыкохом.

Стихиры празднику, глас 2

Стих: Да будут уши Твои, внимлюще гласу моления моего.

Приидите, возрадуемся Господеви, настоящую тайну сказующе: средостение

градежа разрушися, пламенное оружие плещи дает, и Херувим отступает от древа жизни, и аз райския пищи причащаюся, от негоже произгнан бых преслушания ради; неизменный бо образ Отець, образ присносуция Его, зрак раба приемлет, от Неискусобрачныя Матере прошед, не преложение претерпев, еже бо бе пребысть, Бог Сый истинен, и еже не бе прият, Человек быв человеколюбия ради. Тому возопиим: рождейся от Девы Боже, помилуй нас.

Стих: Аще беззакония назриши Господи, Господи, кто постоит Яко у Тебе очищение есть.

Господу Иисусу рождшуся от Святыя Девы, просветишася всяческая: пастырем бо свиряющим и волхвом покланяющимся, Ангелом воспевающим, Ирод мятяшеся, яко Бог во плоти явися, Спас душ наших.

Стих: Имене ради Твоего потерпех Тя Господи, потерпе душа моя в слово Твое, упова душа моя на Господа.

Царство Твое, Христе Боже, Царство всех веков, и Владычество Твое во всяком роде и роде, воплотивыйся от Духа Святаго и от Приснодевы Марии вочеловечивыйся, свет нам возсия, Христе Боже, Твое пришествие; Свет от Света, Отчее сияние, всю тварь просветил еси, всякое дыхание хвалит Тя. Образ славы Отчия, Сый, и прежде Сый, и возсиявый от Девы, Боже, помилуй нас.

Стих: От стражи утренняя до нощи, от стражи утренняя, да уповает Израиль на Господа.

Что Тебе принесем, Христе, яко явился еси на земли яко Человек нас ради Каждо бо от Тебе бывших тварей благодарение Тебе приносит: Ангели — пение; небеса — звезду; волсви — дары; пастырие — чудо; земля — вертеп; пустыня — ясли; мы же — Матерь Деву. Иже прежде век, Боже, помилуй нас.

Стихиры святых, глас 1

Стих: Яко у Господа милость, и многое у Него избавление, и Той избавит Израиля от всех беззаконий его.

Богоотца вси восхвалим, Давида царя, из него бо пройде жезл — Дева. И из Нея возсия цвет — Христос, и Адама со Евою от тли воззва, яко Благоутробен.

Стих: Хвалите Господа вси языцы, похвалите Его вси людие.

Пророческая пророчения виде в старости яве Иосиф Обручник, проявленно исполняемая, обручение воистинну странное, откровение Ангелы прием, Богу слава, — вопиющих, — на землю мир низпославшему.

Стих: Яко утвердися милость Его на нас, и истина Господня пребывает во век.

Брата Божия вси восхвалим, яко святителя суца, мучением же паки просиявша доблественне. Егоже молитвами, Иисусе Боже наш, в вертепе и в пеленах повивыйся, спаси вся, поющия Тя.

Слава, святым, глас 6

Память совершаем Давида и Иакова благочестивых, царя пророка и апостола, перваго епископа: тех бо ученьми лести избавльшеся, Христа славословим, от Девы возсиявшаго и воплощагося, еже спасти души наша.

И ныне, глас 5, Догматик:

В Чермнем мори, Неискусобрачныя Невесты образ написася иногда: тамо Моисей, разделитель воды: zde же Гавриил, служитель чудесе. Тогда глубину шествова немокренно Израиль; ныне же Христа роди безсеменно Дева. Море по прошествии Израилеве пребысть непроходно; Непорочная по Рождестве Эммануилеве пребысть Нетленна. Сый, и прежде Сый, явлейся, яко Человек, Боже помилуй нас.

Вечерний вход

Премудрость. Прости.

Свете тихий святыя славы, Безсмертнаго, Отца Небеснаго, Святаго Блаженнаго, Иисусе Христе! Пришедше на запад солнца, видевше свет вечерний, поем Отца, Сына

и Святаго Духа, Бога. Достоин еси во вся времена пет быти гласы преподобными, Сыне Божий, живот дай, темже мир Тя славит!

Вонмем.... Мир всем

И духови твоему.

Премудрость, вонмем, прокимен гл. 6, *Господь воцарися, в лепоту облечеса.*

Стих: Облечеса Господь в силу и препоясая.

Стих: Ибо утверди вселенную, яже не подвижится.

Стих: Дому Твоему подобает святыня, Господи, в долготу дней.

Сугубая ектения

Рцем вси от всея души, и от всего помышления нашего рцем...

Сподоби, Господи, в вечер сей без греха сохранится нам. Благословен еси, Господи Боже отец наших, и хвально и прославлено имя Твое во веки, аминь. Буди, Господи, милость Твоя на нас, якоже уповахом на Тя. Благословен еси, Господи, научи мя оправданием Твоим. Благословен еси, Владыко, вразуми мя оправданием Твоим. Благословен еси, Святыи, просвети мя оправданием Твоим, Господи, милость Твоя во век; дел руку Твоею не презри. Тебе подобает хвала. Тебе подобает пение, Тебе слава подобает, Отцу и Сыну и Святому Духу, ныне и присно и во веки веков. Аминь.

Просительная ектения.

Исполним вечернюю молитву нашу Господеви...

На стиховне стихиры воскресные, глас 5-й:

Тебе, Воплощеннаго Спаса Христа, и Небес неразлучившася, во гласех пений величаем, яко Крест и смерть приял еси за род наш, яко Человеколюбец Господь, испровергий адова врата, тридневно воскресл еси, спасая души наша.

Стих: *Господь воцарися, в лепоту облечеса.*

Прободенным Твоим ребром, Жизнодавче, токи оставления всем источил еси, жизни и спасения: плотию же смерть восприял еси, безсмертие нам даруя. Вселив же ся во гроб нас свободил еси, совоскресив с Собою славно, яко Бог. Сего ради вопием: Человеколюбче Господи, слава Тебе.

Стих: *Ибо утверди вселенную, яже не подвижется.*

Странно Твое распятие, и еже во ад сошествие, Человеколюбче, есть: пленив бо его, и древния юзники совоскресив с Собою славно, яко Бог, рай отверз, восприяти сего сподобил еси. Темже и нам, славящим Твое тридневное Востание, даруй очищение грехов: рая жители сподобляя, яко Един Благоутробен.

Стих: *Дому Твоему подобает святыня, Господи, в долготу дней.*

Нас ради плотию страсть приемый, и тридневен из мертвых воскресый, плотския наша страсти исцели, и возстави от прегрешений лютых, Человеколюбче, и спаси нас.

Слава, святым, глас 6

Священных память, и царей держава, и веселие бысть Рождество Твое, и в нем, хвалящися, глаголем: Отче наш, Иже еси на Небесех, да святится Имя Твое, Человеколюбче.

И ныне, глас 6, Богородичен:

Днесь невидимое Естество человеком от Девы совокупляется; днесь безмерное Существо в Вифлееме пеленами обвивается; днесь Бог звездою волхвы в поклонение приводит, провозвещая Свое тридневное погребение, яко в злате, и смирене, и ливане. Емуже поем: воплотивыйся от Девы, Христе Боже, спаси души наша.

Ныне отпускаеши раба Твоего, Владыко, по глаголу Твоему с миром: яко видеста очи мои спасение Твое, еже еси уготовал пред лицом всех людей, свет во откровение языков, и славу людей Твоих Израиля.

Святой Боже, Святой Крепкий, Святой Безсмертный, помилуй нас (трижды).

Слава Отцу и Сыну и Святому Духу, и ныне и присно и во веки веков. Аминь.

Пресвятая Троице, помилуй нас; Господи, очисти грехи наша; Владыко, прости беззакония наша; Святой, посети и исцели немощи наша, имене Твоего ради. Господи, помилуй (трижды).

Слава Отцу и Сыну и Святому Духу, и ныне и присно и во веки веков. Аминь.

Отче наш, Иже еси на небесех! Да святится имя Твое, да приидет Царствие Твое, да будет воля Твоя, яко на небеси и на земли. Хлеб наш насущный даждь нам днесь; и остави нам долги наша, яко же и мы оставляем должником нашим; и не введи нас во искушение, но избави нас от лукаваго.

Яко Твое есть Царство, и сила, и слава, Отца и Сына и Святаго Духа, ныне и присно и во веки веков. Аминь.

Тропарь праздника, глас 4:

Рождество Твое, Христе Боже наш, возсия миру свет разума, в нем бо звездам служащий звездою учахуся Тебе кланяться, Солнцу Правды, и Тебе ведети с высоты востока. Господи, слава Тебе. (дважды).

Тропарь святых, глас 2:

Благовестуй, Иосифе, Давиду чудеса, Богоотцу: Деву видел еси рождшую, с пастыри славословил еси, с волхвы поклонился еси, Ангелом весть прием. Моли Христа Бога спасти души наша.

Буди имя Господне благословенно от ныне и до века (трижды).

33-й псалом

Благословлю Господа на всякое время, выну хвала Его во устех моих.

О Господе похвалится душа моя: да услышат кротцыи и возвеселятся.

Возвеличите Господа со мною, и вознесем имя Его вкупе.

Взысках Господа, и услыша мя, и от всех скорбей моих избави мя.

Приступите к Нему, и просветитесь, и лица ваша не постыдятся.

Сей нищий воззва, и Господь услышай, и от всех скорбей Его спасе и.

Ополчится Ангел Господень окрест боящихся Его, и избавит их.

Вкусите и видите, яко благ Господь: блажен муж, иже уповает Нань.

Бойтесь Господа вси святии Его, яко несть лишения боящимся Его.

Богатии обнищаша и взалкаша: взыскающии же Господа не лишатся всякаго блага.

Благословение Господне на вас, Того благодатию и человеколюбием, всегда, ныне и присно и во веки веков. Аминь.

УТРЕНЯ (в составе всенощного бдения)

Слава в вышних Богу, и на земли мир, в человецех благоволение (трижды).

Господи! устне мои отверзеши, и уста моя возвестят хвалу Твою (дважды).

Шестопсалмие.

Псалом 3-й

Господи, что ся умножиша стужающии ми! мнози востают на мя; ...

Псалом 37-й

Господи! да не яростию Твоею обличиши мене, ниже гневом Твоим накажешо мене:...

Псалом 62-й

Боже, Боже мой! к Тебе утреннюю; возжада Тебе душа моя, ...

Слава Отцу и Сыну и Святому Духу, и ныне, и присно, и во веки веков, аминь.

Аллилуиа, Аллилуиа, Аллилуиа, слава Тебе, Боже (трижды - без поклонов).

Псалом 87-й

Господи, Боже спасения моего! во дни воззвах, и в нощи пред Тобою...

Благослови, душе моя, Господа, и вся внутренняя моя, имя святое Его! Благослови, душе моя, Господа, и не забывай всех воздаяний Его! ...

Господи! услыши молитву мою, внуши моление мое во истине Твоей,...

Слава Отцу и Сыну и Святому Духу, и ныне и присно и во веки веков; аминь. Аллилуиа, Аллилуиа, Аллилуиа, слава Тебе, Боже (трижды).

Миром Господу помолимся...

Бог Господь и явился нам, благословен Грядый во имя Господне.

Стих: Исповедайтесь Господеви, яко благ, яко в век милость Его.

Стих: Обышедше обыдоша мя, и именем Господним противляхся им.

Стих: Не умру, но жив буду, и повем дела Господня.

Стих: Камень, его же не брегоша зиждущий, сей бысть во главу угла, от Господа бысть сей и есть дивен во очесех наших.

Собезначальное Слово Отцу и Духови, от Девы рождшееся на Спасение наше, воспоем, вернии, и поклонимся; яко благоволи Плотию взыти на Крест, и смерть претерпети, и воскресити умерших славным воскресением Своим.*(дважды)*

Благовестуй, Иосифе, Давиду чудеса, Богоотцу: Деву видел еси рождшую, с пастыри славословил еси, с волхвы поклонился еси, Ангелом весть прием. Моли Христа Бога спасти души наша.

Рождество Твое, Христе Боже наш, возсия миру свет разума, в нем бо звездам служащий звездою учахуся Тебе кланяться, Солнцу Правды, и Тебе ведети с высоты востока. Господи, слава Тебе.

Чтение кафизм

**Господи помилуй Зр., Слава,
И ныне... читает кафизму в 3 Славы**

Паки и паки миром Господу помолимся...

Крест Господень похвалим, погребение Святое песнями почтим, и Воскресение Его препрославим, яко совозстави мертвые от гроб, яко Бог, пленив смерти державу, и крепость диаволу, и сущим во аде свет возсия.

Стих: Воскресни Господи Боже мой, да вознесется рука Твоя, не забуди убогих Твоих до конца.

Господи мертв нареклся еси, умертвивый смерть, во гробе положился еси, истощивый гробы: горе воины гроба стражаху, доле от века мертвые воскресил еси. Всесильне и Непостижимо Господи, слава Тебе.

Слава, и ныне, Богородичен:

Радуйся, Святая Горо и Богопроходная, радуйся, одушевленная купино и неопалимая. Радуйся, Едина к Богу мируи Мосте, преводяй мертвые к Вечному Животу. Радуйся, Нетленная Отроковице, неискусомужно рождшая Спасение душ наших.

Господи помилуй Зр., Слава, И ныне... читает кафизму в 3 Славы

Паки и паки миром Господу помолимся...

Господи, по тридневнем Твоем Воскресении, и апостолов поклонении, Петр вопияше Ти: жены дерзновение прияха, аз же убояхся. Разбойник богословяше, аз же отвергохся. Убо призовеши ли мя прочее ученика быти; или паки покажеши мя ловца глубиннаго, но кающася приими мя, Боже, и спаси мя.

Стих: Исповемся Тебе Господи всем сердцем моим, повем вся чудеса Твоя.

Господи, посреде осужденных пригвоздиша Тя беззаконнии, и копием ребро Твое прободоша. О Милостиве! Погребение же приял еси, разрушивый адова врата, и воскресл еси тридневно. Притекоша жены видети Тя, и возвестиша апостолом востание: Превозносимый Спасе, Егоже поют ангели, Благословенный Господи, слава Тебе.

Слава, и ныне, Богородичен:

Неискусобрачная Невесто Богородительнице, Яже Евину печаль радостотворившая, воспеваем вернии и покланяемся Тебе, яко возвела еси нас от древния клятвы, и ныне моли непрестанно, Всепетая, Пресвятая, во еже спастися нам.

Полиелей

Хвалите имя Господне, хвалите раби Господа. Аллилуиа (трижды).

Благословен Господь от Сиона, живой во Иерусалиме. Аллилуиа (трижды).

Исповедайтесь Господеви, яко благ, яко в век милость Его. Аллилуиа (трижды).

Исповедайтесь Богу небесному, яко в век милость Его. Аллилуиа (трижды).

Воскресные тропари святого Иоанна Дамаскина:

Благословен еси, Господи, научи мя оправданием Твоим

Ангельский собор удивися, зря Тебе в мертвых вменившася, смертную же, Спасе, крепость разоривша, и с Собою Адама воздвигша, и от ада вся свободша.

Благословен еси, Господи, научи мя оправданием Твоим

Почто мира с милостивными слезами, о ученицы, растворяете Блистаяйся во гробе Ангел мироносицам вещаше: видите вы гроб и уразумейте: Спас бо воскресе от гроба.

Благословен еси, Господи, научи мя оправданием Твоим

Зело рано мироносицы течаху ко гробу Твоему рыдающыя, но предста к ним Ангел и рече: рыдания время преста, не плачите, воскресение же апостолом рцйте.

Благословен еси, Господи, научи мя оправданием Твоим

Мироносицы жены с миры пришедшия ко гробу Твоему, Спасе, рыдаху, Ангел же к ним рече, глаголя: что с мертвыми живаго помышляете Яко Бог бо, воскресе от гроба.

Слава Отцу и Сыну и Святому Духу.

Поклонимся Отцу и Его Сынови, и Святому Духу, Святей Троице во единем существе, с Серафимы зовуще: Свят, Свят, Свят еси, Господи.

И ныне и присно и во веки веков, аминь.

Жизнодавца рождши, греха, Дево, Адама избавила еси, радость же Еве в печали место подала еси, падшия же от жизни к сей направи из Тебе воплотивыися Бог и Человек.

Аллилуиа, Аллилуиа, Аллилуиа, слава Тебе, Боже (трижды).

Малая ектения

Паки и паки миром Господу помолимся...

Ипакои, глас 5

Ангельским зраком ум смущающа, и Божественным востанием душою просвещаемы, мироносицы апостолом благовествоваху: возвестите во языцех Воскресение, Господу содействующу чудесы, подающему нам велию милость.

Малая ектения

Паки и паки миром Господу помолимся.

Степенна, глас 5

Антифон 1

Внегда скорбети мне, Давидски пою Тебе, Спасе мой: избави душу мою от языка льстиваго.

Пустынным живот блажен есть, Божественным рачением воскриляющимся.

Слава: Святым Духом одержатся вся, видимая же с невидимыми: Самодержавен бо сый, Троицы Един есть неложно.

И ныне, тойже.

Антифон 2:

На горы душе, воздвигнемся, гряди тамо, отнюдуже помощь идет.

Десная Твоя рука, и мене, Христе, касающихся, от лести всякия да сохрани.

Слава: Святому Духу богословяще рцем: Ты еси Бог, Живот, Рачение, Свет, Ум: Ты Благостыня, Ты царствуеши во веки.

И ныне, тойже.

Антифон 3:

О рекших мне: во дворы внидем Господня: радости многия исполнен быв, молитвы возсылаю.

В дому Давидове страшная совершаются: огонь бо тамо паля всяк срамный ум.

Слава: Святому Духу живоначалное достоинство, от Негоже всякое животно одушевляется, яко во Отце, купно же и Слове.

И ныне, тойже.

Прокимен, глас 5: Воскресни, Господи Боже мой, да вознесется рука Твоя, яко Ты царствуеши во веки.

Стих: Исповемся Тебе, Господи, всем сердцем моим, повем вся чудеса Твоя.

Господу помолимся — **Господи помилуй**— Яко Свят еси Боже наш... **Аминь.**

Всякое дыхание да хвалит Господа.

Стих: Хвалите Бога во святых Его:

И о сподобитися нам слышанию Святаго Евангелия Господа Бога молим — **Господи помилуй**

Зр

Мир всем - **И духови твоему.**

От (Матфея или Марка или...) Святаго Евангелия чтение **Слава Тебе, Господи, слава Тебе.**

Чтение Евангелия.

Слава Тебе, Господи, слава Тебе.

Воскресение Христово видевше, поклонимся Святому Господу Иисусу, единому безгрешному. Кресту Твоему покланяемся, Христе, и святое Воскресение Твое поем и славим: Ты бо еси Бог наш, разве Тебе иного не знаем, имя Твое именуем. Приидите вси вернии, поклонимся Святому Христову Воскресению: се бо прииде крестом радость всему миру, всегда благословяще Господа, поем Воскресение Его: распятие бо претерпев, смертью смерть разруши.

50 псалом (чтец)

Слава Отцу и Сыну и Святому Духу. Молитвами апостолов, Милостиве, очисти множества согрешений наших.

И ныне и присно и во веки веков, аминь. Молитвами Богородицы, Милостиве, очисти множества согрешений наших.

Помилуй мя, Боже, по велицей милости Твоей и по множеству щедрот Твоих очисти беззаконие мое!

Воскрес Иисус от гроба, якоже прорече, даде нам живот вечный и велию милость.

Спаси, Боже, люди Твоя и благослови достояние Твое, посети мир Твой милостию и щедротами, возвыси рог христиан православных и низпосли на ны милости Твоя богатая; молитвами Всепречистыя Владычицы нашея Богородицы и Приснодевы Марии: силою Честнаго и Животворящаго Креста: предстательства честных Небесных Сил безплотных: честнаго славнаго пророка, Предтечи и Крестителя Иоанна, святых славных и всехвальных апостол: иже во святых отец наших и вселенских великих учителей и святителей, Василия Великаго, Григория Богослова и Иоанна Златоустаго: иже во святых отца нашего Николая, архиепископа Мирликийских, чудотворца: святых равноапостольных Мефодия и Кирилла, учителей Словенских: святаго равноапостольнаго великаго князя Владимира: иже во святых отец наших всея России чудотворцев, Михаила, Петра, Алексия, Ионы, Филиппа и

Ермогена: святых славных и добропобедных мучеников, преподобных и богоносных отец наших, святых и праведных Богоотец Иоакима и Анны (и святого, имя рек, егоже есть храм и егоже есть день) и всех святых: молим Тя, многомилостиво Господи, услыши нас, грешных, молящихся Тебе, и помилуй нас.

Господи, помилуй (12 раз).

Милостию, и щедротами, и человеколюбием Единороднаго Твоего Сына, с Ним же благословен еси, со Всесвятым и Благим и Животворящим Твоим Духом, ныне и присно и во веки веков. — **Аминь.**

Канон воскресный. Глас 5

Песнь 1

Ирмос: Коня и всадника в море Чермное, сокрушаяй брани мышцею высокою, Христос истрясе, Израиля же спасе, победную песнь поюща.

Тебе терноносный еврейский сонм, любве, Благодетелю, к Тебе не сохрани ма-терния, Христе, венча, родоначальника разрешающа терновное запрещение.

Воздвигл еси мя падшаго в ров, преклонься, Жизнодавче Безгрешне: и моя злосмрадныя тли, Христе, претерпев неискушенно, Божественнаго Существа миром мя облагоухал еси.

Богородичен: Разрешися клятва, печаль преста: Благословенная бо и Благодатная, верным радость возсия, благословение всем концем цветоносящи Христа.

Ин канон празднику

Истлевша преступлением, по Божию образу бывшаго, всего тления суща, лучшия отпадша Божественныя жизни, паки обновляет мудрый Содетель, яко прославися.

Видев Зиждитель гиблема человека, руками егоже созда, приклонив Небеса, сходит; Сего же от Девы Божественныя Чистыя всего осуществляет, воистинну воплощся, яко прославися.

Мудрость, Слово и Сила, Сын Сый Отчий и сияние, Христос Бог, сил утаився, елико премирных и елико на земли, и, вочеловечся, обновил есть нас, яко прославися.

Ин канон празднику

Изнесе чрево священное Слово, яве неопально живописанное купиною, смешена зраком человечесим Бога, Евы окаянную утробу клятвы древния разрешающее горькия, Егоже, земнии славим.

Показа звезда прежде солнца Слово, пришедшее уставити грехи, волхвом яве во убоzem вертепе, милостиваго Тебе, пеленами повита, Егоже, радующесея, видяху Самого — и Человека, и Господа.

Ин канон святых

Елицы рождественная сотворяем Воплощшагося нас ради, радостию воспоем Иакова Богобрата и Давида Богоотца.

Слава в Вышних, лица ангельстии в Вифлееме Иосифу предсташа, глаголюще, с нимиже Благоизволившаго воплотитися воспоем.

Давиде Богоотче, с гусльми, от корене Иессеова воплощшася Господа, Иакова праведнаго привлек, воспой.

Богородичен: Воспою Тебе, Господи Боже мой, яко родился еси из Матере Девы Святыя и Сию показал еси надежду душ наших.

Катавасиа: Христос раждается — славите! Христос с Небес — срящите! Христос на земли — возноситеся! Пойте Господеви, вся земля, и веселием воспойте, людие, яко прославися.

Песнь 3

Ирмос: Водрузивый на ничесомже землю повелением Твоим, и повесивый неодолимо тяготеющую на недвижимем, Христе, камени заповедей Твоих, Церковь Твою утверди, Едине Блаже и Человеколюбче.

Желчь убо иже из камене мед ссавшии, в пустыни чудодействовавшему Тебе при-несоша, Христе: оцет же за манну воз благоденствие Ти воздаша отроцы Израилевы неблагодарнии.

Иже древле световидным облаком покрываеми, Живот во гробе Христа положиша: но самовластно воскрес, всем верным подаде тайно осеняющее свыше Духа сияние.

Богородичен: Ты Мати Божия несочетанно родила еси, Иже от Нетленна Отца возсиявшаго, кроме болезней матерних: темже Тя, Богородицу, воплощенна бо родила еси Слова, православно проповедуем.

Ин

Иже дохновения причащяся лучшаго Адам перстный и к тлению поползся женскою лестию, Христа от Жены видя, вопиет: Иже мене ради по мне быв, Свят еси, Господи.

Сообразен брэнному умалению растворением, Христе, быв и причастием плоти горшия, подав Божественнаго естества, землен быв, и пребыв Бог, и возвысивый рог наш, Свят еси, Господи.

Вифлееме, веселися, князей Иудовых Сый Царь: Израиля бо пасый на рамех херувимских, из тебе пройде Христос яве и вознесый рог наш над всеми воцарися.

Ин

Невесты Пречистыя пребогатое Рождество видети паче ума сподобився, лик свиряющих преклоняшеса странным образом, чин же поющих Безплотных, Царя Христа, безсеменно воплощагоса.

Высоотою царствуяй Небес милосердием совершает о нас из Безневестныя Отроковицы: невеществен Сый прежде, но послежде Слово, одебелевшо плотию, да падшаго к Себе привлечет первозданнаго.

Ин

Рождшагоса плотию от Девы без семене Христа Бога со Ангелы вси воспоем, слава в Вышних Богу, взывающе.

Всепазднственный нас ради Истощившагоса, вернии, праздник с Давидом же и Иаковом песньми по достоянию почтим.

Яко жениху от чертога, из матерних ложесн Давид рече Господу изыти, егоже ныне со Иаковом воспоем.

Богородичен: Безневестную и Богородицу Марию почтим: Тоя бо ради нам возсия Правды Солнце.

Катавасиа: Прежде век от Отца рожденному нетленно Сыну и в последняя от Девы воплощенному безсеменно, Христу Богу возопиим: вознесый рог наш, Свят еси, Господи.

Малая ектения.

Паки и паки миром Господу помолимся...

Кондак праздника, глас 3

Дева днесь Пресущественнаго раждает, и земля вертеп Неприступному приносит. Ангели с пастырьми славословят, волсви же со звездою путешествуют: нас бо ради родися Отроча Младо, Превечный Бог.

Икос празднику

Едем Вифлеем отверзе, приидите, видим, пищу в тайне обретохом; приидите, примем сущая райская внутрь вертепа: тамо явися корень ненапоен, прозябая отпущение, тамо обретеса кладезь неископан, из негоже Давид пити древле возжадася. Тамо Дева рождши Младенца, жажду устави абие Адамову и Давидову. Сего ради к Нему идем, где родися Отроча Младо, Превечный Бог.

Иосифа праведнаго, Девы обручника, с Давидом Иакова достодолжно воспоем: сии бо, праведною ходивше стезею, достигоша Небесныя обители, достойно ликующе со Ангелы, нам просят согрешений оставление.

Слава, святым, глас 3

Дева роди Творца всяческих, и волсви грядут Сему плотию поклонитися; человецы со Ангелы славословят; вертеп яке и ясли дароносят, воспевающе рождшагося Отроча Младо, Превечнаго Бога.

И ныне, глас 1

Лик пророческий празднует Божественне чудо, в Тебе бывшее, о Дево! Бога бо, воплощася на земли, породила еси. Темже Ангели с пастырьми поют, волсви же верою со Иосифом вопиют Давиду чудеса, Богоотцу

Песнь 4

Ирмос: Божественное Твое разумев истощание прозорливо, Аввакум, Христе, со трепетом вопияше Тебе: во Спасение людей Твоих спасти помазанныя Твоя пришел еси.

Яже от Мерры горчайшыя воды, яко во образе проначертая Пречистый Крест Твой, Блаже, греховное умерщвляющ вкушение, древом усладил еси.

Крест за древо разумное, за сладкую же пищу желчь, Спасе мой, приял еси, за тление же смерти кровь Твою Божественную излиал еси

Богородичен:: Кроме убо сочетания зачала еси нетленно во чреве, и без болезни родила еси, и по Рождестве, Дева, Бога плотию рождши, сохранилася еси.

Ии

Егоже древле прорече Иаков, языков ожидание, Христе, от колена Иудова возсиял еси и силу Дамаскову, Самарийскую же корысть пришел еси испроврещи, леть пременяя в веру боголепну: слава силе Твоей, Господи.

Волхва древле Валаама словесы ученики, мудрыя звездоблюстители, радости исполнил еси, звезда от Иакова, возсияв, Владыко, языков начаток вводимый приял же еси яве: слава силе Твоей, Господи.

Яко на руно, во чрево Девы сшел еси дождь, Христе, и яко капли, на землю каплющая. Ефиопия, и Фарсис, и Аравитстии острови же, Сава, Мидов всю землю держащи, припадоша Тебе, Спасе: слава силе Твоей, Господи.

Ии

Равен произыде человеком Вышний, волею плоть прием от Девы, яд очистити змиевы главы, приводя вся к Свету живоносному, Бог Сый, от врат безсолнечных.

Языцы, иже древле тлею погружени, пагубы зело вражия убежавше, возносят руки с похвальными песньми, единого чтуще Христа, яко Благодетеля, к нам милостивно пришедшаго.

Из корене израстши Иессеева, Дево, уставы прешла еси человеческого существа, Отчее рождши Превечное Слово, яко благоволи Сам запечатанную утробу проити истощанием странным.

Ии

С волхвы Рождшемуся поклонимся и со Ангелы и Иосифом ликуим, боголепно взывающе: слава в Вышних Христу Богу.

Царствуяй всеми царьми Христос, по плоти от семени Давидова рождейся, избраннаго Иакова прият, брата, якоже изволи.

От Девы Господь явивыйся во плоти, прослави память вашу, снятии, апостолов лучший, Иакове, и Давиде всеблаженне.

Богородичен: Херувимских чинов преимущи и Бога, на руку носима, с плотию понесши, радуйся, Богородице Безневестная.

Катавасиа: Жезл из корене Иессеова и цвет от него, Христе, от Девы прозябл еси, из горы, Хвальный, приосененныя чаши пришел еси, воплощя от Неискусомужныя, Невещественный и Боже. Слава силе Твоей, Господи.

Песнь 5

Ирмос: Одейся Светом, яко ризою, к Тебе утреннюю, и Тебе зову: душу мою просвети омраченную, Христе, яко Един Благоутробен.

Иже славы Господь в неславне зраце, на древе обезчещен волею висит, о божественней мне славе несказанно промышляя.

Ты мя преоблекл еси в нетление, Христе, тли смертныя неистленно плотию вкуш, и возсияв из гроба тридневен.

Богородичен: Ты правду же и избавление нам рождши Христа без семене, свободно содеяла еси от клятвы, Богородице, естество праотца.

Ин

В рабех кесаревым повелением написатися покорься, и нас, рабы сущия, врага и греха свободил еси, Христе, весь же по нам обнищав, и перстнаго от самага единения и общения богосоделал еси.

Се Дева, якоже древле рече, во чреве приемши, родила есть Бога вочеловечшася и пребывает Дева. Еяже ради примирившеся Богу, грешнии, Богородицу сущую воистинну, вернии, воспоим.

Ин

Лютую вражду, юже к нам Владыка отсекая паки плотским пришествием, да держащаго разрушит душетлеющаго, мир сочетая с невещественными существы, положив приступна, Рождшаго, твари.

Людие видеша, древле омраченнии, по днех свет вышня светлости, языки же Богу наследие Сын приносит, подая тамо неизреченную благодать, идеже множайший процвете грех.

Ин

От Девы Чистыя благоволивый родитися, Боже воплотивыйся, слава Тебе, слава Тебе, Иосиф вопияше.

От Девы рождейся и память уяснивый Давида и Иакова, слава Тебе, слава Тебе, Иисусе, Сыне Божий.

Егоже пророк Давид Дождь на Руно нарицаше Богодохновенно, Иаков проповеда Иисуса, Сына Божия.

Богородичен: Ангела глас немолчно тварь приносит Тебе, Дево: радуйся, Мати Чистая Иисуса, Сына Божия.

Катавасиа: Бог Сый мира, Отец щедрот, Великаго Совета Твоего Ангела, мир подавающа, послал еси нам; тем, Богоразумия к свету наставляшеся, от ноци утреннююще, славословим Тя, Человеколюбче.

Песнь 6

Ирмос: Неистовствующееся бурей душетленною, Владыко Христе, страстей море укроти, и от тли возведи мя, яко Благоутробен.

В тление поползся родоначальник, Владыко Христе, преслушаннаго брашна вкуш, и к животу возведен бысть страстию Твоею.

Живот низшел еси ко аду, Владыко Христе, и тление растлевшему быв, тлением источил еси Воскресение.

Богородичен: Дева роди, и рождши пребысть чиста, на руку носящаго всяческая, яко воистинну Дева Мати понесшая.

Ин

Прииде, воплощься, Христос Бог наш из чрева, Егоже Отец прежде денницы раждает; правления же держа пречистых сил, в яслех скотиях возлежит и пеленами повивается, разрешает же многоплетенныя пленицы прегрешений.

Юно из Адама отроча смешения, родися Сын и верным дадеса, будущего века Сей есть Отец и Начальник и нарицается Великаго Совета Ангел. Сей крепок Бог есть и держай областию всю тварь.

Ин

Иже бе исперва к Богу, Бог Слово ныне утверждает немощное древле видевохраниити, еже по нам существо, имже Себе вторым общением абие проявляя страстей свободное.

Грядет нас ради из Авраамлих чресл темнопадшия во мраце прегрешений сыны воздвигнути, долу поникших, иже во свете обитаяй и яслех чрез достояние, ныне благоволив в человеческое спасение.

Ин

Предстояху, ужасающесея, чини Небеснии вертепу и Рождество пречистое воспеша немолчно: слава в Вышних Богу рождшуся.

Сел еси на Престоле, якоже клялся еси, Владыко, пророку Давиду, от Плода чрева Его прошед, Иакову же Церкви предал еси престол, Христе.

Царь убо Давид, и пророк чуден, и праотец показася Божественнаго воплощения, первоепископ же ученик Иаков Иисусов.

Богородичен: Молимся, о рабех Твоих, Дево Богородице, из Тебе Воплощеннаго моли, яко Тя и Едину Предстательницу нашу вемы.

Катавасиа: Из утробы Иону младенца изблева морской зверь, якова прият; в Деву же всельшеесе Слово и плоть приемшее пройде, сохраншее нетленну: Егоже бо не пострада истления, Рождшую сохрани неврежденну.

Малая ектения.

Паки и паки миром Господу помолимся...

Кондак святых, глас 3:

Веселия днесь Давид исполняется Божественный, Иосиф же хваление со Иаковом приносит: венец бо сродством Христовым приемше, радуются, и неизреченно на земли Рождшагося воспевают, и вопиют: Щедре, спасай Тебе чтущия.

Икос:

Неизреченным советом раждается плотию, Безплотный описуется ныне телом, неописанный, и спасает непреложно оба существа; начало приемлет, Иже естеством Безначальный и Един Безлетен; зрится Младенец, Сый всесовершенный; носится руками, носяй всяческая. Темже Того сродством почтенныя яко Бог венчает Своим Рождеством, яже прославляюще верою, немолчно вопием: Щедре, спасай Тебе чтущия.

Песнь 7

Ирмос: Превозносимый отцев Господь пламень угаси, отроки ороси, согласно поющия: Боже, благословен еси.

Плотию обложься якоже на удице льщения, Божественною Твоею силою змия низвлекл еси возводя вопиющия: Боже, благословен еси.

Земли непроходное осуществовавый составление, во гробе покрывается плотию Невместимый. Емуже вси поем: Боже, благословен еси.

Богородичен: Едину убо Ипостась во Двою Естеству, Всенепорочная родила еси Воплощеннаго Бога. Емуже вси поем: Боже, благословен еси.

Ии

Пастырие, свиряюще, ужасно светоявление получиша: слава бо Господня облиста их, и Ангел, воспойте, — вопия, — яко родися Христос, отцев Бог благословенный.

Внезапу с словом Ангеловым Небесная воинства, слава, — вопияху, — Богу в Вышних, на земли мир, в человецех благоволение: Христос возсия, отцев Бог благословенный.

Глагол что сей — рекоша пастырие, — пришедше, увидим бывшее, Божественного Христа. Вифлеема же дошедше, с Рождшею поклоняхуся, воспевающе: отцев Боже, благословен еси.

Ии

Слуги убо неистовно поपालет, спасает же всепалаящая со страхом юныя, седмочисленным разжжением возвышена; ихже венча пламень, независтно Господу подающе благочестия ради росу.

Помощниче, Христе, человеком, противное гадание, воплощение неизглаголанное имей, посрамил еси; богатство обожения носяй, вообрази ныне, Егоже ради упованием свыше в преисподний приидохом мрак.

Зле неударжанно возвышаемый, нечестно бесящийся от развращения мира, низложил еси всемошне грех, яже привлече прежде, днесь же от сетей спасаеши, воплощся волею, Благодетелю.

Ии

Паче слова Рождеству Богородицы Марии лица Ангельстии дивящися, Иосифу вопияху: в Вышних слава, и на земли мир.

Невестоводец убо Давид, чертожник же Божественныя Церкви Иаков бывше, глаголаху: воплощйся нас ради, Боже, благословен еси.

Иже во пророцех царь и во царех пророк, со Иаковом Богомудрым и нам воспой: воплощйся нас ради, Христе, благословен еси.

Богородичен: В неопальной купине и росодательней печи Ты прописавшися, Мати Пречистая, без семене родила еси воплощеннаго Бога, Присноблагословенная.

Катавасиа: Отроцы, благочестию совоспитани, злочестиваго веления небрегше, огненнаго прещения не убояшася, но, посреди пламене стояще, пояху: отцев Боже, благословен еси.

Песнь 8

Ирмос: Тебе, Вседетелю, в печи отроцы, всемирный лик сплетше, пояху: дела всякая, Господа пойте и превозносите во вся веки.

Ты о вольней спасительныя страсти помолился еси чаши, якоже невольней: два хотения, двема бо по коемуждо носиши существа, Христе, во веки.

Твоим вседетельным схождением ад, Христе, поруганный избева вся, яже древле лестию умерщвленныя, Тебе превозносящия во вся веки.

Богородичен: Тя яже паче ума богомужне Словом Рождшую Господа, и девствующую, вся дела, Дево, благословим, и превозносим во вся веки.

Ии

Влечет Вавилоня дщи отроки плененныя Давидовы от Сиона к себе, дароносцы же слет волхвы дети, Давидове Богоприятней дщери молящися. Тем, воспевающе, воспоим: да благословит тварь вся Господа и превозносит во вся веки.

Органы уклониша плачевныя песни, не пояху бо в земли чуждей отроцы Сионовы, вавилонскую же разрешает лесть всю и мусикийския составы, в Вифлееме возсияв, Христос. Тем, воспевающе, воспоим: да благословит тварь вся Господа и превозносит во вся веки.

Корысти Вавилон царства Сионя и плененное богатство прият, сокровища же

Христос в Сион сего, и цари звездою наставляя, звездоблюстители влечет. Тем, воспевающе, воспоим: да благословит тварь вся Господа и превозносит во вся веки.

Ин

Пагубы убежавши, еже обожитися прелестию, непрестанно поет излиывшагося Слова юношески вся с трепетом тварь, неславно хвалу, боящися, приносит, тленна сущи, аще и мудре терпяше.

Грядеши, заблуждшее на пажить обращая цветотворную из пустынных холмов языков востание, человеческое естество, силу нужную человекоубийцы угасити, муж же явився и Бог промышлением.

Ин

Воплощагося Христа, Егоже славословиша Небесныя силы и Иосиф обручник непрестанно воспевае: вся дела, Господа пойте и превозносите Его во веки.

Воплощагося Христа, Егоже прорече Давид Богоотец и людем пропевае Иаков, вопия: вся дела, Господа пойте и превозносите Его во веки.

От Девы рождшагося Христа и возвеличившаго Давидову и Иаковлю священную память, яко друзей Его, вся дела, Господа пойте и превозносите Его во веки.

***Богородичен:* Царя Христа, Егоже нам роди Богородица Мария, и по Рождестве пребысть Дева Чистая, вся дела, Господа пойте и превозносите Его во веки.**

Хвалим, благословим, покланяемся Господеви, поюще и превозносяще во вся веки.

***Катавасиа:* Чуда преестественнаго росодательная изобрази пещь образ: не бо, яже прият, палит юныя, яко ниже огонь Божества — Девы, в Нюже вниде утробу. Тем, воспевающе, воспоем: да благословит тварь вся Господа и превозносит во вся веки.**

Богородицу и Матерь Света в песнех возвеличим!

Песнь 9

Величит душа Моя Господа, и возрадовася дух Мой о Бозе, Спасе Моем.

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем! (То же повторяется по окончании каждого следующего стиха.)

Яко призре на смирение рабы Своея, се бо отныне ублажат Мя вси роди.

Яко сотвори Мне величие Сильный и, свято имя Его, и милость Его в роды родов боящимся Его.

Сотвори державу мышцею Своею, расточи гордыя мыслию сердца их.

Низложи сильныя со престол, и вознесе смиренныя; алчущия исполни благ и богатыя отпусти тщи.

Восприят Израиля, отрока Своего, помянути милости, якоже глагола ко отцем нашим, Аврааму и семени его даже до века.

***Ирмос:* Исаие, ликуй, Дева име во чреве и роди Сына Еммануила, Бога же и Человека, Восток имя Ему, Его же величающе, Деву ублажаем.**

Падшаго человека восприял еси, Владыко Христе, из ложесн Девических всему совокуплься, греху же ни единому причащся: всего от истления Ты свободил еси пречистыми Твоими страстьми.

Боготочною кровию истощенною, Владыко Христе, от Твоих пречистых ребр и животворящих, жертва убо преста идольская, вся же земля Тебе хваления жертву приносит.

***Богородичен:* Не Бога безплотна, ниже паки человека проста произведе Чистая Отроковица, и Нескверная: но Человека совершенна, и неложно совершенна Бога. Егоже величаем со Отцем же и Духом.**

Ин

Изрядное течение зряще волсви необычныя новыя звезды новосияющия, Небеса просвещающия, Христа Царя знаменующия на земли, рождшагося в Вифлееме на спасение наше.

Новорожденное, — волхвом, глаголющим, — Отроча Царь, Егоже звезда яви, где есть Тому бо поклониться приидохом. Яряся, Ирод смущашеся, Христа убити богоборец шатаеся.

Испыта Ирод время звезды, еяже вождением волсви в Вифлееме поклоняхуся Христу с дары; еюже, ко отечеству наставляеми, лютаго детоубийцу оставиша по-ругана.

Ин

Образы несветлы и сени приведены, о Мати Чистая, видевши Слова, нова явльшагося от врат заключенных, мнящий же истинную светлость, достойно Твою благословим утробу.

Желание получивше и Божия пришествия христокраснии людие сподобльшесе, ныне утешаются паки бытием: яко живоносну благодать даеши, Дево Чистая, поклониться славе.

Ин

Рождшемуся от Девы вся тварь трепетом послужи: Небеса убо — звездою, земля же — яслми, гора — вертепом, волсви — дарми, пастырие — чудесем, Ангели же — слава в Вышних Богу.

Царь от пастырей древле убо Давид бысть, от колена же Иудова и царскаго ты, Иакове, пастырь паствы показался еси Воплощшагося, Агнца Вышняго и Сына Божия.

Вифлееме, ныне веселися, град быв Новаго Давида, и Сионе, возвещай Церквей старейшинство, общее веселие, всех Царя, и Того угодники ныне восприемши.

Богородичен: Ангельстии собори Тя, Богородительнице, славят, и человеческий род Тя непрестанно песньми почитает, Ты бо Божественным Рождеством земныя с Небесными совокупила еси. Темже Тя почитаем.

Катавасиа: Таинство странное вижу и преславное: Небо — вертеп, престол Херувимский — Деву, ясли — вместилище, в нихже возлеже Невместимый — Христос Бог, Егоже, воспевающе, величаем..

Малая ектения.

Паки и паки миром Господу помолимся...

Свят Господь Бог наш! — Яко свят Господь Бог наш. — Над всеми людьми Бог наш.

Ексапостиларий 8:

Два Ангела видевши внутри гроба, Мария удивляшеся, и Христа не знаящи, яко вертоградаря вопрошаше: господи, где положил еси тело Иисуса моего Званием же Того познавши быти Самого Спаса, слыша: не прикасайся Мне, ко Отцу отхожду, рцы братии Моей.

Слава - светилен святых

Со Иаковом воспоим, славным Богобратом, Давида Богоотца, Иосифа же Божественнаго, Богородицы обручника: Христову Божественному Рождеству послужиша во граде Вифлееме боголепно, со Ангелы, волхвы же и пастырьми Тому песнь поюще, яко Богу и Владыце.

И ныне, праздника:

Посетил ны есть свыше Спас наш, Восток востоков, и сущии во тьме и сени обретохом истину, ибо от Девы родися Господь.

псалом 150-й

Глас 5. Всякое дыхание да хвалит Господа! — Всякое дыхание да хвалит Господа!

Хвалите Господа с небес, хвалите Его в вышних. Тебе подобает песнь Богу. Хвалите Его вси ангели Его, хвалите Его вся силы Его. Тебе подобает песнь Богу.

Стих: Сотворити в них суд написан: слава сия будет всем преподобным Его.

Господи, запечатану гробу от беззаконников, прошел еси из гроба, якоже родился еси от Богородицы: не уразумеша, како воплотился еси, безплотнии Твои ангели: не чувствовала, когда воскресл еси, стрегущии Тя воины. Обоя бо запечатлестася испытующим, явишася же чудеса кланяющимся верою таинству: еже воспевающим, воздаждь нам радость и велию милость.

Стих: Хвалите Бога во святых Его, хвалите Его во утверждении силы Его.

Господи, верей вечныя сокрушив, и узы растерзав, от гроба воскресл еси, оставль Твоя погребальная, во свидетельство истиннаго тридневнаго Твоего погребения: и предварил еси в Галилеи, в пещере стрегомый. Велия Твоя милость, Непостижимо Спасе, помилуй и спаси нас.

Стих: Хвалите Его на силах Его, хвалите Его по множеству величества Его.

Господи, жены текоша на гроб, видети Тя, Христа, нас ради пострадавшего, и пришедша, обретоша ангела на камени сидяща, страхом отвальшемся, и к ним возопи, глаголя: воскресе Господь, рцйте учеником, яко воскресе от мертвых, спасая души наша.

Стих: Хвалите Его во гласе трубнем, хвалите Его во псалтири и гуслех.

Господи, якоже изшел еси от запечатаннаго гроба, тако вшел еси и дверем заключенным ко учеником Твоим, показуя им телесная страдания, яже подъял еси, Спасе Долготерпеливый: яко от семени Давидова язвы претерпел еси, яко Сын же Божий, мир свободил еси. Велия Твоя милость, Непостижимо Спасе, помилуй и спаси нас.

Праздника, глас 4

Стих: Хвалите Его в тимпане и лице, хвалите Его во струнах и органе.

Веселитесь, праведнии, Небеса, радуйтесь, възиграйте, горы, Христу рождшуся; Дева седит, Херувимов подобящися, носящи в недрах Бога Слова воплощенна; пастырие рожденному дивятся; волсви Владыце дары приносят, Ангели, воспевающе, глаголют: Непостижимо Господи, слава Тебе.

Стих: Хвалите Его в кимвалех доброголасных, хвалите Его в кимвалех восклицания: всякое дыхание да хвалит Господа.

Богородице Дево, рождшая Спаса, упразднила еси первую клятву Евину, яко Мати была еси благоволения Отча, носящи в недрах Божие Слово воплощенное. Не терпит тайна испытания. Верою единою Сию вси славим, зовуще с Тобою и глаголюще: Неизреченно Господи, слава Тебе.

Стих: Из чрева прежде денницы родих Тя, клятвася Господь и не раскается.

Приидите, воспоим Матерь Спасову, по Рождестве паки явльшуюся Деву: радуйся, граде одушевленный Царя и Бога, в немже Христос пожив, спасение содела. С Гавриилом воспоем, с пастырьми прославим, зовуще: Богородице, моли из Тебе Воплощеннаго спастися нам.

Стих: Рече Господь Господеви моему: седи одесную Мене.

Отец благоизволи, Слово плоть бысть, и Дева роди Бога вочеловечшася; звезда возвещает, волсви поклоняются, пастырие чудятся, и тварь радуется.

Слава, святых глас 8

Кровь, и огонь, и курение дыма, чудеса на земли, яже провиде Иоиль: кровь — воплощение, огонь — Божество, курение же дыма — Дух Святой, нашедый на Деву и мир облагоухавший. Велие таинство Твоего вочеловечения, Господи, слава Тебе.

Преблагословенна еси Богородице Дево, воплощшим бо ся из тебе ад пленися, адам воззвася, клятва потребися, ева свободися, смерть умертвися, и мы ожихом. тем воспевающе вопием: благословен Христос Бог благоволивый тако, слава тебе.

Слава Тебе, показавшему нам свет!

Великое славословие

Слава в вышних Богу, и на земли мир, в человецех благоволение. Хвалим Тя, благословим Тя, кланяемтися, славословим Тя, благодарим Тя великия ради славы Твоея.

Господи Царю Небесный Боже, Отче Вседержителю, Господи Сыне Единородный, Иисусе Христе, и Святыи Душе. Господи Боже, Агнче Божий, Сыне Отче, вземляи грехи мира, помилуй нас.

Вземляи грехи мира, приими молитву нашу. Седяи одесную Отца, помилуй нас. Яко Ты еси Един Свят; Ты еси Един Господь, Иисус Христос, в славу Бога Отца, аминь.

На всяк день благословлю Тя и восхваляю имя Твое во веки, и в век века. Сподоби, Господи, в день сей без греха сохранитися нам!

Благословен еси, Господи Боже отец наших, и хвально и прославлено имя Твое во веки, аминь.

Буди, Господи, милость Твоя на нас, якоже уповахом на Тя.

Благословен еси, Господи, научи мя оправданием Твоим (трижды).

Господи! прибежище был еси нам в род и род. Аз рех: Господи! помилуй мя, исцели душу мою, яко согреших Тебе.

Господи! к Тебе прибегох: научи мя творити волю Твою, яко Ты еси Бог мой, яко у Тебе источник живота, во свете Твоем узрим свет. Пробави милость Твою ведущим Тя!

Святыи Боже, Святыи Крепкий, Святыи Безсмертный, помилуй нас! (трижды).

Слава Отцу и Сыну и Святому Духу, и ныне и присно и во веки веков, аминь.

Святыи Безсмертный, помилуй нас. Святыи Боже, Святыи Крепкий, Святыи Безсмертный, помилуй нас!

Тропарь воскресный

Днесь Спасение миру бысть, поем Воскресшему из гроба, и Начальнику жизни нашея: разрушив бо смертию смерть, победу даде нам и велию милость.

сугубая ектения.

Помилуй нас, Боже, по велицей милости Твоей, молим Ти ся, услыши и помилуй!..

просительная ектения.

Исполним утреннюю молитву нашу Господеви...

Премудрость!

Благослови!

Сый благословен, Христос, Бог наш, всегда, ныне и присно и во веки веков.

Аминь.

Утверди, Боже, святую православную веру, православных христиан во век века!

Пресвятая Богородице, спаси нас!

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем!

Слава Тебе, Христе Боже, Упование наше, слава Тебе!

**Слава Отцу и Сыну и Святому Духу, и ныне и присно и во веки веков, аминь.
Господи, помилуй, Господи, помилуй, Господи, помилуй. Благослови.**

Слава Тебе, Христе Боже, Упование наше, слава Тебе!

Воскресый из мертвых, Христос, истинный Бог наш, молитвами Пречистыя Своея Матере, святых славных и всехвальных апостол, (имена святых храма и дня), святых праведных богоотец Иоакима и Анны и всех святых помилует и спасет нас, яко Благ и Человеколюбец.

Великаго Господина и Отца нашего Кирилла, Святейшаго Патриарха Московскаго и всея Руси и Господина нашего Высокопреосвященнейшего Ювеналия, Митрополита Крутицкого и Коломенского, Богохранимую страну нашу Российскую, настоятеля, братию и прихожан святого храма сего и вся православныя Христианы, Господи, сохрани их на многая лета.

На 1 часе поется кондак “Взбранной Воеводе” или празднику.